



SAOPĆENJE ZA JAVNOST

Zloupotrebe budžetskih grantova **Edin Ražanica* osuđen na četiri mjeseca zatvora**

(Brčko, 27.6.2024. godine)

Tužilaštvo Brčko distrikta BiH okončalo je postupak po optužnici protiv Edina Ražanice (45), predsjednika brčanskog udruženja "Centar demokratije", kojom se teretio da je zloupotrebama budžetskih grantova, sebi i bliskim osobama pribavio imovinsku korist blizu četrdeset hiljada KM. Po okončanju još jednog u nizu antikorupcionog procesa¹ u vezi sa zloupotrebama grantova iz budžeta Brčko distrikta BiH, Ražanica je kao odgovorno lice u tom udruženju nepravosnažno osuđen na kaznu zatvora u trajanju od četiri mjeseca. Uz zatvorsku kaznu na koju je osuđen po sporazumu s Tužilaštvom, a koji je zaključen pošto je vratio cjelokupnu imovinsku korist pribavljenu krivičnim djelom, njemu je izrečena i zabrana vršenja dužnosti u udruženjima građana i fondacijama na period od pet godina.

Podsjetimo, optužnicom podignutom krajem prošle godine, Ražanici je stavljeno na teret da je u periodu od 2017. do 2020. godine, postupajući u svojstvu odgovornog lica ovlaštenog za raspolaganje novčanim sredstvima udruženja i zaduženog za osiguranje zakonitosti rada, sredstva iz budžetskih grantova dodijeljena za rad udruženja trošio u svoju i u korist trećih lica. On je tada optužen da je, iako je bio dužan da raspolaže i upravlja imovinom udruženja s dužnom pažnjom, na odgovoran i zakonit način, u najboljem interesu udruženja, iskoristio položaj tako što je protivno ciljevima udruženja trećim licima plaćao ugovore o djelu, odnosno usluge koje nisu izvršene, plaćao zakupninu supruzi za prostor koji uopće nije služio potrebama udruženja i članovima porodice dao na korištenje skupocjene telefonske uređaje plaćene sredstvima udruženja. Kako je navedeno u optužnici, nakon što je na račun udruženja po odlukama Odjela za stručne i administrativne poslove Vlade i gradonačelnika Brčko distrikta BiH isplaćen ukupan iznos od 65.500,00 KM na ime grantova namijenjenih za rad udruženja, svjestan da korištenjem novčanih sredstava protivno ciljevima udruženja pribavlja sebi i drugima imovinsku korist, što je i htio, on je iskoristio položaj utroškom 39. 713,00 KM za lične potrebe i potrebe bliskih mu osoba.

Tužilaštvo je optužilo Ražanicu za teži oblik krivičnog djela Zloupotreba položaja ili ovlaštenja (iz člana 377 stav 2 Krivičnog zakona Brčko distrikta BiH), istovremeno predloživši sudu da mu oduzme imovinsku korist, te izrekne mjeru sigurnosti zabrane vršenja dužnosti odgovorne osobe u udruženjima i fondacijama na period od najmanje pet godina. U nastavku postupka, optuženi je izvršio uplatu i vraćanje cjelokupnog iznosa imovinske koristi, ispunivši ključni uslov Tužilaštva da se uopće razgovara o zaključenju sporazuma o priznanju krivice. Prihvativši potom zaključeni sporazum, sud je donio nepravosnažnu presudu izrekavši mu kaznu zatvora od četiri mjeseca i predloženu zabranu vršenja dužnosti. Presuda se može pobijati žalbom, izuzev odluke o krivičnoj sankciji.

**Ovom objavom ne prejudicira se ishod krivičnog postupka i ne narušava princip presumpcije nevinosti. Svako se smatra nevinim dok se pravosnažnom presudom ne utvrdi njegova krivica.*

GLAVNI TUŽILAC
ZEKERIJA MUJKANOVIĆ

¹ Nezavisno od informacija koje su kasnije pojavile u javnosti i istraživačkim medijima, istrage zloupotreba budžetskih grantova u distriktu Brčko započete su još 2017. godine, kada su u ovom tužilaštvu otvoreni prvi predmeti. Od tada ih je formirano više od dvadeset, od čega su u devet predmeta podignute optužnice. Četiri optužnice već su rezultirale pravosnažnim osuđujućim presudama, uz uglavnom istovremeno izricanje počinocima zatvorskih i novčanih kazni. Ukupna imovinska korist obuhvaćena optužnicama iznosi preko 473. 000,00.